

文道希先生遺詩

文道希先生遺詩序

吾友萍鄉文道希學士既歿門下士徐君積餘爲刊雲起軒詞若干卷盛傳海內矣今歲葉君玉甫復搜刊君遺詩若干卷以君朋輩故舊僅存者莫余若屬序其端君天秉卓犖博聞強記才氣不可一世余始逐試南昌得交君俱少年耳越三歲同鄉舉同計偕居京師君不第已名動公卿間尋擢巍科超遷講幄侍從聲光赫然傾天下當是時國軍新挫於島鄰輸款割地幾不國君激世變益究中外之務凡時政得失列位賢不肖慷慨陳論指斥權貴人尤力爲所側目久矣及肇宮闈之隙狃新舊之爭務歸罪於

君媒孽構陷屢欲擠之死地脫身走日本乃免夫薰以香
自燒膏以明自消自古賢人才士懷負奇偉動與禍會遭
戮辱屏棄摧落者不可勝數况厄於一時愈伸於百世是
豈足道哉久之君返自東瀛復時與君游聚過金陵必主
余家流連嘯詠意氣不衰最後飲秦淮別去遂永訣君撰
箸宏富詩詞特鱗爪耳然君博極羣書詩乃清空華妙不
擗捨故實自襍嘗推爲獨追杜司勳波瀾莫二卽身世飄
泊亦頗肖似之此可懸諸天壤俟定論者也獨是君歿未
十歲國步驟改九宇沸擾余屢轉徙窮海老病復迫之殘
夜孤呻中追憶君箕踞揮麈高睨大談往往揣君聲音笑

貌濃眉皤腹辟易千人之概以自壯無如斯人不復得景
光之不可把翫讀君詩益纏興亡離合死生博一瞬之感
也己巳五月義甯陳三立

文道希先生詩集序

夫詩者持也興觀羣怨範圍弗過品彙事物曲成弗遺其
大旨達於書通於易可以從政可以處變紹先啓後連抃
而無窮居守正行載義粵稽往哲固如斯矣今者葉君遐
菴刊文道希先生遺詩督序于余余少生長于粵知文氏
先世宦粵事甚詳後又得從道希先生游誼不容辭援筆
述之先生曾祖諱守元敦詩尚義稱於鄉閭祖諱晟守惠
州調嘉應咸豐時遭寇殉難父諱星瑞擊賊復仇官至高
廉道先生幼而惇敏長益闕通爲陳蘭浦先生高足詞采
軼儔輩光緒庚寅成進士以一甲第二授編修癸巳恩科

典江南鄉試攷覈務求才實是科得人爲盛旋擢侍讀學士感激帝知屢上封事太后憎之丙申削職南歸戊戌政變太后怒責珍妃珍妃者廣州將軍長善女先生嘗授書者也慮禍及走日本與扶桑詩人游處庚子乃歸國是秋余從吳彥復師至滬居于鄰巷袖詩樞謁先生一見獎成不遺記詩有神山風雨走孤鸞句尤爲先生激賞時八國師旅凌突中原日薄崦嵫翠華西狩余作太清樂府紀時事先生見許謂似二李會合肥相國北上議和先生賦感事詩有無分麻鞮迎道左收京還望李西平句又和陶詩有乞食偶得飽高臥亦似仙句澤畔行吟不忘忠悃有古

賢風烈矣先生旋歸萍鄉甲辰夏復至滬同游張園品核
人物因出示山居諸篇謂效皮陸在野言野秋八月復游
湘中病卒年四十九先生修軀山立耳白似歐公旣得其
名未得其壽彌可慨已原號芸閣晚號純常子自著純常
子一書用莊子純純常常迺底於狂之語寓感傷也初家
貧薄游江浦客吾邑吳武壯軍中武壯爲薦入粵督張靖
達幕居積年文檄敏瞻同輩推服先生旣沒公子永譽公
達以諸生抱學窮居亦歷佐粵皖段少滄沈子培兩提學
幕有聲於時先生四世人人有集一門風雅江介所稀談
者比之烏衣王氏余近纂皖雅兼及名宦輯錄遺詩用光

簡冊遐菴與先生累代通家嘗黃鐘毀棄瓦釜雷鳴之日
獨能捐金搜刻全集誠可謂守道不變好行其義者矣己
巳六月廬江後學陳詩

文道希先生遺詩敘

廿載前吾師萍鄉文道希先生既歿恭綽撰挽詩久而不成蓋情緒煩怫哀至于無文遂無以自達也既乃思輯其遺著詢諸師之子永譽知強半散佚僅晉書藝文志暨雲起軒詞先刊行者猶傳于世爲憮然者久之恭綽卅角從師游師所以撫愛獎進之者甚至常寓書南昌家中任綽縱覽所藏典籍綽得牘通書史者實由于此又庚子謁師海上師教以爲詩之道甚悉且舉自作過祆祠七律爲例又喜綽所爲游仙詩以爲雅麗對人恆稱道之今忽忽將卅載宛在心目而遺書散盡所著亦罕存嗟夫以師之才

雄氣猛事功不就乃並區區簡冊之流播而亦靳之耶乃
誓爲蒐集越十載未有所獲久之聞湘中有藏師遺稿者
未得見繼乃得詩二卷憶少時曾讀師詩稿審非其全復
致力訪求期成完帙凡三載共得詩如干首攜至海上與
永譽共校之二人之意以爲人事無常宜先印詩稿徐及
其他乃舉付手民餘俟別謀剗剗綽維師匪欲以學術鳴
者茲編尤學之鱗爪顧平生襟抱志行可藉窺其大凡昔
陳右銘先生讀師水龍吟詞謂非文人所能師之詩何莫
不然蓋信乎非世之詩人之作也近論世者恆謂清社之
屋西朝實尸其咎蓋洪楊之役清祚隳失而復得乃臨朝

者迄無悔禍憂勤之意徒逞其陰詐猜忌之謀屏棄賢良倚任羣小加以宴安酖毒倒行逆施蓋不待玉步之移已知瓦解之無可挽矣使師當光緒中葉得行其志以其間斡回時運收拾人心開通風氣則戊戌庚子以迄辛丑諸役或竟弭而不發未可知也計不及此徒使論者以人之云亡致慨於邦國殄瘁而師之感時憂世之抱悲憤牢愁之況乃僅流露于紙墨間嗚呼以師爲文人或軒輊于甘陵洛蜀間以師擬于急功近名之列者斯真一孔之見也昔人云誦其詩讀其書不知其人可乎是以論其世也余論及此亦欲後之誦師詩者于清末之時局有所考焉其

所得將有出于詩之外者至于師之詩之所以爲工或亦
卽因是也是爲序十八年七月番禺葉恭綽

老幹撐空勢絕倫
豫章材大著嶙峋
望崇當世推宗匠
業盛名山抗古人
獨負奇才蘇學士
常存忠愛屈靈均
抒情託興歸風雅
吟冷西江月一輪

清詞冰雪付瑯鐫
香火曾留翰墨緣
今見水心契同甫
翻欣山谷得任淵
輝生卷帙千秋煥
芬溢縑緙萬口傳
回首龍門渺何處
瓣香拜爇倍淒然


遐菴先生編刻萍鄉師遺詩成感賦二詩

南陵徐乃昌

文道希先生遺詩

春雪

一冬惟薄被不異嶺南居乍覺朝寒重方知夜雪初負暄
還試筆招友欲圍鑪溜滴懸簷久寒深入地徐紅欺燈燄
小白透紙窗疎過隙常侵硯融泥或濺裾色迷王子筆味
俊庾郎蔬雜樹瓊花璨高臺玉屑餘撇天浮蠖蝶沁土壓
蚣蝮樓宇聊登望山河但一如仙經瑤島幻佛說化城虛
遠岫皆栖鶴長江不上魚臙脂何處井重壁此間廬晃蕩
搖銀海栖遲讀素書袁安誠臥矣吳昊倘行歟我訝堯年



弟子葉恭綽敬輯

冷人思舜日舒布裘堪取暖歸去帶經鋤

唐楊炯有七言律駱賓王

有七言今用十七言律白樂天夷陵別微之詩七言長律

至日

衆緯迴天候吾廬亦閉關無衣憐蔀屋改歲遍瀛寰逆水
河豚上栖簷凍雀孱有時梅索笑不借酒開顏大海成連
去緱山子晉還熏鑪俛短几蕭散異朝班

山居六十四韻

用九佳全韻增入九字

息影岩阿足蕭閒事事皆橐天符柱史膠日命靈媧籬援
春栽槿郊扉晝閉柴野游來廣莫代謝紀無懷瀟灑華陽
帽優游闕里鞵棊圖重布子劍解與添差溪集商同趁淩

居客並佳拾岡哀椽媪蹇浦挑蓮娃醜凸深凹畫朝榮夕
悴菱繞庭滋石蔓支牖斲風榭嵐壁峯常峭荒園戶半闌
宗生高避莧夾植柳兼懷哀壑形犀豁飛泉勢鬱穰溪暉
搖颭豔淵曲湊流瀆地僻防癘瘴風淫慎瘡痍巾車尋窈
窕虛室納威裊棲峻捫蘿徑循流泛菽簿凝陰羣象肅吹
籟八音齠應律牛鳴冒知更鶴頰黠龜供特健藥鹿繫放
生牌植翳恆囹雉黏蠶競綴蝸樹鷄增夙饌蓮鮓一作鮓花脯薦
清齋杯喜柙瘳列瓔將蒜殼排榮膺宏景賚貧減庾郎鮓
楓槭思朋友蠶瓜餉等儕霜清蟬嘒月黑狗哇噪酒甕
生新潤琴牀積舊羅囊盛雲裊裊筓過水潏潏草彩遙相

接林光淨若揩漁師爭蹈獺庖子欲羹豺機汲輪回瀑村
謠答遠颿閒情調燕雀微物富螺蠹跌宕從岩隱彎環步

短街杖藜初翼鑠躡屨尙徘徊

二句一作坐來能鬼蛾行處尙徘徊鬼蛾並上聲

遠樹低如薺文莎細似緙松高疑倚岱橘老漫逾淮萬竹
青竿亞雙檉紫穗挨蠹深南越桂蟻聚北宮槐學種莊生
瓠還移孔墓楷齊民曾講習老圃信癡狂仰面看飛鳥停
車軼怒蛙振奇搜越絕詼詭誌齊諧汲黯狂猶昔劉伶醉
可埋華胥前聖國阿閼化人階頭頰周秦籍心嫌鄭衛哇
雅言稽郭璞字解徇徐鍇揚子玄傷巧相如賦類俳劬宵
鱗火耀鳴晦翰音嗜整帙標緗帶繙經剝翠釵凌空揚鷲

羽幕澗邁凡駟倦几拋書卷棲塵滿箭斂藩維苞枿對旄
節信音乖漕粟資連舶傳烽走快輦幽浪更反側胡梵漸
離低颺怒號無竅瀾狂浩著涯求沙虛抱朴聞唱感洪崖
素髮俄垂領朱門肯乞膜脩然煎白石甯要佩青綈轉晷
時光迅繁翼歲暮筵折梅聊酌醕煨芋自然黠撫枰音延
譖笑投壺止罰嗒五窮仍樂道一旦敢行怪風輕見貫休
山詩鞋頰見相鶴經鬱又海賦流滾見江賦此數字韻
書並不載今以意增用又元微之店臥聞會飲詩有三
省詎行怪司天卻是不載
怪字不載
柏茗燒殘香養病骸

和杜寫懷二首

朗吟招隱多原僧

儒生亦何知南北問方俗路遙鳥翮倦書重牛腰束中原

經亂後十室尠豐足
羯羗商賈歎斲削
羸老哭司農算瑣屑
幽隱殊未燭四郊
況多壘志奪卿士辱
傾國營驕軍刮血嗜
鶯粟起徒送驪山徵
兵戍函谷譬如伐條
枚不及待萑綠小人
競利欲達士媚幽獨
治外氣轉虛求逕道
逾曲代斲非所懷何
人爲司牧

孤鐙照旅館危坐但
抱膝春寒寡人事不
出近十日懷古信淵
源涉世少儔匹陳蕃
有遺言安能事一室
縱心籠宇宙所悲歲
月疾結網感懸蛛處
禪笑微蟲入極浩無
外我志未易畢變局
開與閉瞋目黑似漆
賈生年弱冠論事愛
逞筆五餌制匈奴咄
哉意不密改弦利因
時粥粥齊琴瑟

擁衾夢前聖嚴更靜衢術

談仙詩 有序

湘陰郭芋菴言楚中神仙晉有陶真人元明有李真人
麻衣孝子之流皆以肉身成道道光間又有昭顯真人
者陳姓業縫衣事親孝後忽得道坐化山中其尸不腐
鄉人奉之咸豐間以護城功封今號近乃有強植枯腊
擬爲登仙者惑乃滋甚略述名理率爾成篇

吾觀輟耕錄始知木乃伊

輟耕錄作木乃伊
此從四草攷作伊

倭人釋四草

亦復詳論之身歿藉藥力猶能千歲支天竺重佛法今猶
有留遺往往一入定不寒而不飢頂爲鳥雀集目若簾幕

垂彈指無罔明遊山非遠師欲待後佛出其事多然疑牛
亨問物理百昌本無知西人謂草木要復能睡癡感動其
寐性不煩雨露滋久久方喚醒榮華未嘗衰楚俗好神仙
傳派尤瓌奇自晉迄今日代有不朽尸鍼刺卽血出口積
還生髭里閭競崇奉雨旱時禳祈朝命列祀典民欲天不
違巫風遂成俗亂扣冢中鼯蟲出口鼻間乃復棄路陞開
棺有嚴禁當用國法治至人在天壤與世無成虧小藏形
無內大揮霍兩儀利己或由聃御民或軒羲賈人或爲帝
室女或生兒騎牛竟西行攀龍杳難追十字困雅素雙林
病末尼來如希有鳥去如歛生芝四大湊合身何用自保

持就使更億齡終返微塵微朽滅同衆人大道信坦夷三
宿輒留戀毋乃識者嗤嗟彼數子者此病誰能醫癰疣不
決潰休息尙未期青甯則生程腐草爲蠋飛萬形遞相嬗
造化無停機烏鳶與螻蟻何不檀施爲胡爲夔文繡有若
太廟犧倚社羣祀櫟折草共撲著將無鬼神守或爲狐彪
依翹然異萬形豈謂和天倪或云品彙物大梵所兒嬉搏
之莫能散响之莫能吹不亡以待盡久亦不得辭或云山
澤癰鍊精若凝脂筋骸固結束刀斧難刻剗火傳薪不燼
日出露未晞因緣時節至脫然方得歸落葉復其根寧能
憶來時舉目皆方圓勿個矩與規鉢心有仁義乘願宏慈

悲星月何高高吾寧所處卑夜深鼠嚙案寒燈照空帷縱
論俯仰間躔度密已移素位可自得前哲不吾欺

贈山中人

開門向石壁但覺日色古有時採藥還蹲對林下虎何由
瞻妻子得無憚風雨問之不能答已忘世間語

久雨

六十日久雨頑陰鬱難開几案皆礎色山川沒飛埃有時
兼雪霰靜夜聞霆雷卷塵死積蠹琴滑生衣苔花性遏窈
窕江聲助喧阗農犁不插土漁笠將升臺乾坤有白日杲
杲安在哉

暇閱西方史籍於二百年內得三人焉其事或成或敗
要其精神志略皆第一流也各贊一詩以寫余懷

俄羅斯帝大彼得

燭龍耀神彩北極靈象迴守成古所難乃獨生斯才遜荒
藝術就徙宅文明開積錮剷疇昔英聲召方來壯圖促積
齡未及宇宙恢遺言藏冊府吁此人生哀

法蘭西帝拿破崙第一

布衣登皇極智勇實蓋世森然定國律察物成達例風厚
鵬方徙運移雕不逝百戰奮英暮六合啓幽翳疾雷振山
海身敗名不替永懷百世下宜有金輪帝

美利堅總統華盛頓

昊天育羣生君貴民不賤奈何大寶貪遂使澆風扇倚人
起末世至德符龍變立國賴神功辭職鮮餘戀規模良足
多繼纂倘能善長吟大風歌慨想伊祁禪

東武吟

羲車忽西轂鯤池豈南運在列多回邪國步屢顛僨抑沈
不能翻冥漠何可問悽悽微子吟悄悄玉門愠

萍鄉朝陽山謁先曾祖融谷公墓敬賦一首

潔齋勵精爽祇肅躋幽宮逶迤越南郊攀陟登崇蔭德潛
光允曜善溥世咸宗道與元氣合精以昭靈通遠接廬江

賢近啓程鄉忠庭誥有遺則雜誦愧未融終懷匡濟略永
播仁賢風

高陽李文正師挽詩

己丑歲余考內閣中書文正與漢軍徐協揆常熟翁尙
書錢塘汪侍郎實閱卷取余卷第一始得謁見公道光
甲辰舉人與先大夫同年及余入翰林公又爲教習師
故數接譚讌獎勸兼至甲午乙未國事危急公不恤下
問凡所論說公每是之丙申正月余以小疾乞假數日
公由園退直卽遣人問曰果有疾耶斷勿續假蓋知余
意欲去也旋被論劾語稍侵公迄今年餘未敢通問於

邱鈔見飾終之典遂作此詩存之集中不寄輦下

崑閩昭玉英流彩發龍袞豐條能霰雪要在植德本孰是
更治亂終始篤款悃尙書果邦彥疑若鳳立巘綠圖授神
哲赤縣洗昏輝執持魏國琦風度江夏琬盡言夙所受一
跌志愈勉西園公賣鬻北寺內排撻妖沴起海堧釀亂始
闡苑老成與謨議王臣仗忠蹇狐裘政多門唐棣偏其反
國論時見接衰淚猶在吻遠猷遜謝安諒節符卞壺三古
不可作學校廢已遠謬思追周文文賓文賓至我乎館滌恥
誓嘗膽觸邪或裂睥幾同范滂錮終賴如晦斷脩門去俄
頃別抱未及款碩德不愆遺仰視白日短百年論相術黃

髮務恪謹屹然守正道帝鑒公繾繾祝宗久有祈况乃乘
真返魏闕空崢嶸涕洒馬足踈神州竟安居中宵數微管

感事

大鐘遺去猶金牛闢蠶叢內政苟不脩曷貴道里通惹愚
既啓侮弱昧亦召攻舉事無定是所分昭與輦軒轅去以
久天道固不公塊然龍象姿乃爲鞭繫傭

其二

古來名家言得失亦參半白馬非馬歟語變資笑粲微聞
核名實撫卷獨興歎求成謂之和徒令武臣玩割地諱言
租民氣愈消散飾詞安其危何以起衰悞越朝非真王緬

貢由互換百年多失計二事可併案

和杜三韻三篇

威鳳不戢翼靈龍無逆鱗舉世仰圖畫自天乃降神逍遙
千載間誰知隱現身

五色雜霞旭一世名之虹陰陽有不正敢奪暘雨功倏然
化美人遨遊天地中

酌酒高堂上獨弦不成調漆園與竺乾遺文有樞要吾失
固已多毋貽達者笑

舟行清遠英德宿雨新霽山川清曠

征雁歸猶昔峽猿聲未遠山川互超忽歲月何悠緬余自

會行此水今巖懸彩旭鮮林帶殘露泫烟稠識村近帆欹
十六年矣知岸轉滄波坐移人前塵若在眼扣舷歌屢發采若心莫
展遙懷隔楚雲何由寄微款

暢志詩十首 壬辰秋日作

微生多憂患髻非實初肇逶迤兵刃間得活競分杪已未豐
年余四歲先祖烈公殉嘉應州難時先君方以福建同
知入都引見二月初二日賊已合圍筮之知不吉家人無
允行代者獨令先母攜廷式走避曰余此孫將來有用七代
管一代不留汝同殉也明日行出入賊中幸而獲濟七八
歲壬戌之冬先君方赴廣州請餉而賊數萬人奄至先妣
危壬戌之冬先君方赴廣州請餉而賊數萬人奄至先妣
彭夫入集幕僚議曰賊已大至吾家人應死諸君無苦願
去者已具舟城東可先去也時幕友惟李君不去因部置
州兵千人守城撤叙珥髮之令懸爆竹然大堂燭門者賊破
城即燃放俾聞警得自裁也余雖幼小然至今鼓角之聲破

倉皇之狀猶在耳目嗚呼可以悲已賊圍三日竟去後獲其人言每夜見城中燈火旗幟如三四萬人

集枯

不羨菀習苦已甘蓼家風重名節十世清德紹

余家自承新還薄鄉

至余十世世有清德郡縣志之豈敢愛微軀夙夜思悄悄上稽黃虞世旁

矚垓埏表逝者無停留棖觸空中鳥

聖者不可作羣言日紛紜積勢之所趨偏重乃失真經術

與師儒各以風氣因何必分漢宋力行貴近仁吾師陳京

卿履蹈清且醇濃濟康成哉清挹紫陽芬匪徒作調人蓋

爲君子羣十年依函丈于學未識津皇皇事三禮紉綴徒

殷勤大風激海水層雲暗重闔萬竅各怒號六籍將生塵

誰持天黃符下治百世文孔胸銘制作泣涕悲獲麟璇璣

固可執蹙視殊荆榛

高柯隕勁風碕岸水所齧雖非明自煎常恐剛則折所以
五千言卑下實要訣受生自有分吾意終稍別詩人美山
甫保身固明哲持己力威儀補袞仗名節吐剛而茹柔信
非儒者說吁嗟廣戒徒甯待斧鉞絕苦寒戀敝襦迷行求
古轍清泉出巖阿漱之誓芳潔

九衢騁車馬日夕亦不止昌黎嘆浮生多塗共趨死貪愚
良足哂賢達豈得已君看松柏姿凌寒逾茂美一朝作梁
棟世泰身則否太虛本洞然浮雲詎能滓小草與遠志出
處偶然耳逐逃敢安步救溺必濡己臨機忽惆悵欲問巫

咸子

良友不我棄清晨忽來過
整衣接其容中嚴外温和
高論窮造化反顧瞻山河
長嘯氣若雲寧知世所訶

咄嗟捫籥智天道固莫測
寒暑遞相代羲娥盈復昃
孰爲主張是毋乃造化力
太素含物魂八卦未消息
地皇有龍顙溫洛應昭德
洞庭廣張樂靈爽紛如織
庸知清角聲驚起蒼鵝翼
鮫人重金珠哀怨徒唧唧
傾身營一飽綢繆愧顏色
毋勞呵壁問知白但守黑

崑崙仙人居五城十二樓
絕頂凌萬國洪波分九流
黃帝建元宮穆滿復來遊
豈爲耽荒樂實以威遐陬
鸞凰不復

鳴千載何悠悠遂令大秦珠高挂懸圃頭吾欲馳天馬登
高覽神州驚颿捲流沙四顧無匹儔王母倦披圖徘徊宴
青邱折軸陟危坂凜然不可留仰瞻辰星輝且發商聲謳

水經注崑崙上
千辰星之輝

爰居集國門何嘗慕鐘鼓孔雀生南荒焉能惜毛羽衡門
有賢士志不在圭組運窮習詩書所願博升黼朱門敞瓊
筵赤日卓當午前庭羅琛燾後堂饜歌舞千箱萬筐篋終
爲何人聚高明誠多幸將毋鬼神怒

仕宦逾百年農桑久不諳低頭事俗學自縛僵如蠶天光
牖其衷晚近非所甘抗懷在三代萬象窮幽探豁然見本

源我思日潭潭顧與世俗論聞言走趨趨迂謬良自哂頌
諛豈足貪聊欲飲美酒舍己供沈酣草元笑楊雲清言覓
劉惔三復素餐詩鑒古中心慚

涼秋三日霖庭潦不得乾孤燈燄轉薄落葉粲以繁昔我
同懷友或已歸桐棺宿草雖早列遺書終不刊或沈百僚
底或宿雲巖端趨舍各異路盟心共艱難往往青霞氣夜
逼星斗寒漂搖風雨間何處求巢安良時會可待微祿不
願干庶憑彌天網用迴大海瀾

四十初度自警

濟世期黃虞繕性可堯禹男兒在天地此志不莽鹵昨者

昭昭日迴視忽已古二毛颯垂肩百憂茹莫吐艱難衣袵
戒黽勉袞職補中宵耿不寐靜聽蟲飛蠱非無雲壑思竭
來戀神武鳥獸非同羣吾知孔公撫詩人詠鳴鳩易象慎
履虎百年不易滿且挽千鈞弩

弔黃豪伯

豪伯名楸材上高人精算術又言輿地之學會爲丁文
誠探印度事官彌勒縣知縣與岑襄勤不合乞歸會典
館開奏調入都居一年乞假歸省卒於上海余與交十
六年矣於其卒也詩以弔之

豪伯嶷奇人亦復非近翫商高有遺術往往能淹貫中年

忽別我萬里遊汗漫蓮葉大如船野人黑如炭可證釋迦
說兼補郭璞讚尤恨緬甸事每述必三嘆當時貳師罪甘
受迦葉謾豪伯在緬甸聞乾隆間傳文忠賄和事與國史異存之以參異聞終爲白里滅
信符智士算吏事非所宜焦桐乍入爨仍繪呂溫圖惜哉
功未半我嘗戲君言神鋒百回鍛精如隱山豹貌似垂頭
鶴猶期著作成胡爲去恆幹新知殊未得舊侶忽星散積
然自歎息欲作無生觀

聽雨

少年輕入極有志盡馳騁青冥誰云高便欲凌倒景沈酣
百家學閔默萬緣境如大海浮航波濤漸已領涼秋九月

中木瘦藤亦瘦夜牕颯疎雨寒燈照孤冷稍喜賓從稀遠
聞鈴柝警澄情赴元漠夙念悼頑獷廓然忘物我况乃知
躁靜明晨尋落葉着屐踏高嶺仍攜陶潛尊更問葛洪井
黃菊有初花芳香可深省

月下作

此月有圓缺此時無古今皎然分別相幻出異同心攬月
忽在手推月猶在衾空中雲疊疊微聞千種音勿以帝網
密坐令世諦深百非循環起不到無絃琴乃知簷蔔花樂
意尙可尋

詠上海辛園草木

於春得熙陽園野擢繁秀冥冥更微雨滲漉滋灌漱積李
既縞夜崇桃尤炫晝叢篁乍脩脩低枝拂籬右黃楊厄歲
閏濃綠亦森茂暄風來海外百昌種殷富顏色妖且妍翻
然笑孤陋日輪不雙飛坤軸無停轆各秉氣化力大造甯
薄厚孰資有爲法廣被無私覆幽蘭浥朝露孤花倚瑇瑩
徘徊不忍摘馨香永襟袖

鰕鮒篇用陳思王韻

鰕鮒戀潢汙不異天池流斥鷃搶榆枋亦復逍遙游大小
兩無盡明德自相傳一壑專且美可以知崑邱疾風壞林
木咄嗟誰爲謀積垢毀高閎洪波溢神州陸沉須臾間仰

視青天浮岩栖豈獨適遂令達者憂

和陶連雨獨飲

處世若多否在己寧獨然何如且龍蠖出入夷惠間乞食
偶得飽高臥已似仙酌酒望太虛失此青冥天誰能挾浮
雲一見象帝先楊朱泣歧路不如驅車還吾生多憂患倏
忽至此年戰勝良足欣舌存可無言

古有所思

崑崙之竹諧鳳聲十二律呂相和鳴何如張樂洞庭野音
繁調悲衆仙下鴻鵠翔四海中路方徘徊闐闐長風忽相
送顧盼已覺心神開我所思兮千里萬里東風澹澹吹海

水笑撚花枝且歡喜

中秋夜不見月

昨宵清輝接我席今晨扶桑暎復出誰知晚來雨意濃素
娥掩鏡雲間沒世間萬事不可預鑽龜七十竟何益有酒
不爲中秋飲有琴不爲中秋彈朗然八極在方寸何假桂
樹供牽攀故鄉兄弟不易聚聊與永夜相盤桓重陽風雨
倘不作買輿共上羅霄山

縛雞行用杜少陵原韻

哺雞不肥責雞惰撒糠無幾令雞爭雞求苟活人得利終
亦不免相燖烹造化賦形偶歉薄爲人豢牢豈殊縛吾將

使雞化鳳凰來集梧桐在阿閣

萍鄉有毛女洞志以爲仙也朱子詩云惟有郵童解
端的向儂道是野狐精夫信野狐之能精而不信
毛女之得道一彼一此無是非也朱子齋中讀書
詩旣言飛昇諒匪難又注魏伯陽參同契言丹鼎
之學其不作無仙論審矣此詩之言蓋假辭譏世
俗之以僞亂真者衆也讀者每失其旨作此解之
識者鑒焉

白日辭世昇青天昌黎昔譏謝自然華山毛女俗所傳此
事已在漢晉前吾鄉巖穴邃以繇佳處往往巢神仙有實

曾觸昭王船楊朱泣歧涕泗漣巫陽九招不能先蓬首戴
勝馳雲駟風鬣霧鬣來蹠蹠曰龍曰鸞猶且妍何獨野狐
能說禪晦菴先生良自賢坐談罍中汞與鉛仙人已死古
俚侗呂巖高名壓稚川擾擾萬物皆蛻蟬螳螂各慕誰腥
羶

題畫柳陰垂釣

羊裘隱淪去我久舉世皆爲名利來陰陰垂柳無限好獨
釣不與人爭隈東海鯨魚那足膾北溟鯤徒隨雲雷一竿
優遊任身世臨淵結網胡爲哉

七夕

媽雲橫河月無色翠蚪夜燄疎空逼若英不惜玉芝香鞞
紋蹙浪驚秋國吳宮乞靈今幾時翾風飛燕好腰支南樓
達旦聲逶迤神駟不來心問誰鼙鼓沉沉玉琴弄轆轤汲
井銀餅凍劍光栗人愁不看採取桐花飼么鳳雙鬟獻杯
風宛轉繚綾深碧羅緋淺露盤斜倚相風竿八蠶解織同
功繭瘴雲拂衣梧葉黃鱸烟欲燼鳴鶯鶻願指魚山訊神
嫗玉釵敲竹終茫茫驪龍睡餘海風起錦衾望斷嬋娟子
買桃釀酒三千年迴望溟淵一杯水

廣王右丞夷門歌效阮文達

長平流血成海水秦人搏趙如搏豕魏王不敢救邯鄲公

子獨能憂阿姊驅車向前心死秦迴車卻憶監門人七十
老翁善料事一椎擊破函關春世間誰解侯生志不獨存
趙兼存魏紛紛晉鄙握兵符臘用嘉平豈天意

題黃小宋大令壯遊圖冊

飛塵蔽空日射隙人海周旋不容膝聞說壯遊心歷然山
蒼水茫接我席畫圖直寫今衣冠詩句都麗尤可觀當時
完顏都水張太守承平盛蹟君追還吾聞九州之外海環
遶君盍縱遊及未老邊馬不行思故鄉更借莊生渺茫鳥

秋雲篇別袁州示諸弟

秋雲窈窕生空山逶遲未肯來人間忽然湧出千萬態金

巒翠巘相回環繞郭澄江又可愛蒼波鱗鱗映衣帶白石
爲底沙爲堤空明不覺游魚礙吾身如雲心似水出岫還
鄉偶然耳竹馬雖無少日遊山巍波激是吾州諸弟讀書
重名節遠送使我肝腸熱棣華堂上先壯烈昆第七人讀
書處名棣華堂今屋
偏之西尋餘芳好好同心念明發夜來皓月出江天起視星
辰正歷然翻笑贊皇公輔器卻從此地憶平泉

潯陽大風

異哉天公不自惜怒挾萬籟驅千軍濃陰不放滄海日白
波欲薄匡廬雲坐覺乖龍氣橫豪遠聆哀雁心憂殷徒行
畏溼渡恐覆惟有巨艦驕不聞酌酒自溫且高臥一笑風

伯徒紛紛

題延煦堂北山莊壁

煦堂漢軍許姓築室銀山之麓將與所懼偕老而尺波電謝往

事塵空故末章及之煦堂讀竟泣涕淋漓也

今我忽不樂驅車出皇都西山近人厭囂雜不及北山第
鬱而盤紆許君結屋山之隅呼吸蒼翠參元珠健兒百戰
好身手歸看石壁生春蕪丈夫要捋蛟龍須冥冥鴻鵠歸
來乎

猩猩哀啼鬼夜嘯圈豚柵牛晝防豹清溪石上狼跡繁碧
火巢中鴟怪叫野人談彪聲悚息山僧逢虎心失竅君胡
賦此囚山篇豈有彼美能同調甕酒新篘園果紅一醉爲

君夢圓嶠

蓬萊弱水程三千江媯賦裏初嬋娟一遊塵中經幾年雲
鬢縹緲歸諸天無心莫贈紫玉佩有夢不到黃金鈿悄然
桃花自開落萬古此恨知難湔毒龍螯手猶安禪餘香在
袂何由捐

題埃及斷碑爲伯希祭酒作

昔聞造字始倉頡其次爲梵爲佉盧左旋右旋縱各異大
抵必備于六書云何回梵文略似蟲迹汚花紋雲篆具一
體別以記號何粗疏西天雄整女直秀番夷緬甸多縈紆
字母稽華嚴諧音問西儒但能以聲寫胸臆象形會意指

事之義嗟已無國家威棱燁四表聲教所暨窮天樞三十
六體隸譯館古碑更出西南隅諦觀波磔苦不識十有四
格左轉存形模如堂如室如門屏如繩如紐如盤盂象人
象物各有意繪鳥繪獸態則殊絕非三合四合乃成字音
讀不借阿伊烏傳聞此碑頌功德彼國再釋猶模黏都統
郎君世莫辨礪闕遏碑二體誰能呼此文奇古尤可愛延
閣廣內合並儲一畫肇初效龜鳥八體並列兼虫爻侏離
恍聽驃國樂儼雅若披王會圖長吟遠想忽太息願君足
此勿問奇肱車

琴臺讌集詩時同集者黃仲弢梁節菴志仲魯顧印

伯紀薌聰張君立

我身江海思歸客一事無成鬢霜積縱橫百代興廢事爛
漫九陌鶯花迹攻駒雖然十二閑長嘶朔風想沙磧放歸
正感聖澤厚一笑自振紳天翻冥冥深霧鎖闔闔習習涼
風生肘腋故人襲組居漢皋鸞鳳舊侶參游翱朝披官牘
治萬艘夕偕詞人賦離騷牙期曠世有同調氣誼直並琴
臺高陽春一曲世罕和欲換宮徵非吾曹暮春花竹秀如
綺浮萍野鳧泛芳沚清尊引滿荷深罽險韻冥搜多弔詭
自然奇響答天籟不用繁音驚里耳爲君斂手操幽蘭曠
野不憂來虎兕

懷梁節菴焦山用東坡自金山放船至焦山詩韻

山林之樂君所耽，遠辭嶺海來江南。我知焦山信福地，三
壺可四二別三。人生入世損真氣，吐絲自縛僵如蠶。孰能
游戲萬物外，俯仰天地心無慚。天公愛爾太英絕，長安人
海空潭潭縱之。八極任揮斥如虎，出柙風雲酣古鼎。千年
出光恠夜，聞精彪妖狐。譚神明坐鎮百靈，懾毒螫未發。先
誅龕去歲洋匪美生結黨欲踞焦山起事故及之聖朝有道邁周雅，孤臣放逐
分自甘。寒泉幽籟足禪悟，野蔬苦筍供饕貪。朵殿論思夢
不到，單于係頸材猶堪。遙想閉門傲風雪，夜與梅花同一

菴

起句唱韻宋人多不依步今特借用耽字

再疊前韻追懷東坡索節庵和

神仙中人昔蘇耽靈蹤遍歷江之南有竅欲鑿混沌七參
禪直證菩提三文人已死精氣在至今有墓飛金蠶婆娑
一眴八百載遠覽前哲空增慚層樓甲觀起空際我舸大
艦趨江潭滄波直瀉海門失廣樂毋乃天公酣我生于世
百無用獨習腐儒迂謬譚咄哉之子亦避世蒲團依倚古
佛龕阻風未易求白墮離鄉不復思黃甘江風山月不論
價卽此已是天公貪薜蘿被逕子長往長楊奏賦吾寧堪
才疎語墮更惆悵媿無玉帶留山菴

感春

蟄雷震地百草萌江邊流澌漸作聲狐裘不御獸炭熄妖
紅稚綠相將迎昨夜寒風忽狂怒睡起吹折江頭樹八方
亭毒熙春陽爾獨支離豈其數

去年一冬無雪霰使者禱祈滕六倦寬政暗與天心符未
必餘蠹在郊甸軍人椎牛樂無事貧士閉門呵凍研東南
連歲歌歲豐豐年米賤大傷農况聞官吏慮朝夕十倉九
倉困聚空廿年生聚豈易得徑思綠章奏蒼穹注桃染柳
且愛惜留取元氣滋天功

旅館蕭條但觀物有蛛吐絲何密勿籠畔百蟲恣口吻其
謀則深事則拙明堂昭昭開四門天網恢疏無怨恩采蘭

亦復培蘭根獨寐晤言思淑媛浩浩河水千重源予懷渺
兮瞻天闈

贈徐仲虎觀察

建寅

百年以來海事亟衆論蠶午紛牛毛獨喜徐君窺本原其
才又如切玉刀江南燕南三千里歲暮過我不憚勞雪花
墮地大如掌羣龍凍蟄妖狐嗥達官朝參臥不起寒士瑟
縮媿緼袍今歲寒甚都中人以庚午以來所未有兩人縱論決江海窗紙發
白雞三號元冥收威不得逞真氣上貫明星高有時亦憶
江東姝宜笑善睐顏如桃虞兮一歌足千古重瞳英魂若
可招壯遊曾却摩登伽垂暮乃憐韋玉簫將毋封侯志消

阻弭轡欲向柔鄉逃西望巉巖冰雪閒兵氣隱隱騰招搖
不周長風振東海神山漂蕩連巨鼇吾君求賢慮大計好
策狼望陳龍韜不然懷寶敢迷國後世或且譏吾曹狂言
醉矣醒自失幸賴公瑾斟醇醪

爲徐仲虎建寅題海外歸舟圖圖爲無錫華翼綸作

徐侯磊落天下奇學兼中外國良醫歉然不足更遠適窮

究政體張綱維損上益下論英絕

君譯德國議院章程今
自序一篇文極雄偉

不能用後世師如此歸來不虛矣明珠大貝空爾爲

華君與君素同志盼君歸來有深意蒼茫海內不數人磅
礪古今竟何事我重披圖發深喟龍虵陸處紛殊異百年

苦短猶栖遲三昧神通儘遊戲

微雨

瓶花婀娜但無韻小窗微雨便能幽冷然魂夢寄寥絕六
鑿與我逍遙遊東園老翁頗知道歲晏菘蒿望早收

與冒鶴亭論詞卽書其水繪庵填詞圖卷後

迦陵鳥聲千種囀冶袖鶯鸞露花泫鴟絃忽澀五雲飛廢
苑碧蕪秋滿滿烏啼燈炷歡夜闌美人遠訊衣裳單縷金
團扇不堪弄寶鴨香蕉花正殘此時何地寄愁絕銀餅宛
轉冰泉咽一尺玲瓏在掌中小鬟莫問幽蘭訣花宮磊砢
銀雲低靈草欲落香成泥公子瑤華自愛惜綠蹊長翫三

春蕘

夜坐吟

銅壺咽漏夜初長
蘭釭墜穗凝寒光
絃聲淒淒管聲促
送入北風聞斷腸
此歌不足聽此心
不足傳如海漾千
波循環固無端
階除無聲集輕霰
白鳳旋空羽如電
鄴臺銅瓦化鴛飛
冷灰糝入甘泉殿

題陶淵明集後

典午得國本狐媚
晉祚不長天所棄
一馬化龍帝江東
禮樂乃復存華風
百餘年來略整飭
種桑江邊望能植
八公草木破苻堅
羣鳥啞啞自相得
舉杯忽勸長星酒
寶鼎已

落他人手彭澤宰官先見機五斗折腰吾自歸不論闕閱
政可隱三徑松菊西山薇笑談不入遠公社縱浪形神憑
大化阜帽還同遼海寧蒼生莫忘東山謝

鷹

鬱鬱朮霄漢吾知顧盼豪風雲長在足搏擊未辭縲此去
翔寥廓何時見爾曹向來飛動意平蹴九天高

平楚晚望

客思與春色蒼茫不可分野陰連大澤草氣薄層雲往往
村歌答微微宿酒醺夕陽催萬象有業樂河汾

東洙鄉居

賃屋初誅草分畦恰插秧雨餘蝸漫壁春暖蝠巡梁地僻

尊溪邏虛回喚凶郎

粵人謂赴集為虛唐時已然

執甌評茗事苔綠上

衣裳

粵江雨望

密雨昏如霧陰雲重挾風越人舟楫利江勢夏秋雄啜茗
微吟後看潮半睡中向來行路熟不復羨漁翁

萍鄉郊行雜詩

苧服初秋着川原綠尚新土音連楚濁民俗似唐醇朝露
槿榮薄暑風椒氣辛今年亞禾熟野老笑迎人

蓄水多調鴨穿籬不吠彪點茶呼客至移碓喚童扛窗窄

恆遮嶺牆高礙瞰江依然穴處意慎莫陋吾邦

佳氣鬱葱葱東南望武功分支走吳楚高勢敵衡嵩雙杏
開還落三真去不逢幾時龍出沒奇響答雷風

寸土皆資命何人不杖犁瘠貧民自苦髦秀學猶稽弔古
心方切微文手自攜愛才思衛國監稅望濂谿

城鄉戶疎密強半是烟家諸季聯鑣出羣兒捧袖譁就池
搯玉藕攀架摘金瓜隨處留殮飯寧知日易斜

吉安白鷺洲書院

桃花艷滿林春色幾時深雨後添江漲鶯啼感客心登高
望雲物招隱睇烟岑獨有高山意沉吟詠子衿

游化成巖

重尋巖畔路一十五年餘張子舊遊地衛公會讀書披雲
碑蘚古拾石硯材儲乍喜涼風過童童竹影疎

九月二十日雨中偕二姊靜芳五姊蕙芳五弟葭浦
暨惠卿姪梅氏二甥同遊江南會館濃陰送秋清
漪照影悵然有懷晉侯姊倩亦至率成五言八句
相約遺花勝清遊喚筍將雨中人不共秋晚意何長竹亞
知城暝荷疎聽水香謝庭舊風雪回首一淒涼

十月二十五日自南昌至九江途中作

破夢五更起經霜萬物淒晴鋪山翠薄寒壓渚烟低魯酒

埋孤悶吳棉乞凍驚我行渾忘遠還逐暝鴉栖

贈李博孫工部

之子有奇氣呼酒看西山千秋粲可數一官聊自閒藏書
非世玩夢樂笑天慳此豈折腰吏期君江海間

涂中卻寄京師諸友

緇塵染素衣遊子遽言歸泛泛水春色行行山夕暉放懷
抄酒譜惜別軫琴徽尙媿逃名者沉觀杜德機

雙蓮

弭節辭金闕聞香隔絳河雙蓮龍女怨都荔漢宮歌蘋末
風初起楊枝露若何猶然倚闔闔未敢託微波

弔明長陵

燒後銀山壯冰凌石獸殘英風扶棟宇闕殿想衣冠建國
才堪數經邊力已殫寂寥懷霸烈山海暮雲寒

落葉

愁思與黃葉紛紛欲較多庭陰增夕照簾影淡文波廢院
尋僧話高雲見雁過京華轉蕭瑟歸夢繫煙蘿

立冬日過洞庭湖泊岳州

積漲冬不涸逆風船自行地形疑虎踞火力與龍爭百粵
通雲嶠三吳接水程樓船堪習戰何用鑿昆明

送夏穗卿同年會佑歸里

槐陰連廣陌之子遽言歸未得南風便那應北客非到家
聞越鳥經雨浣征衣還望金門路知余情庶幾

周苻農閣學

壽昌

年丈輓詩

卅載文壇將人傳任昉名養生通道錄止足臥書城史校
蘭臺籍詩舉蕙畝英重繙先友志那禁淚縱橫

哭潘伯寅尚書師

尚書謚文勤年六十一

喬木推耆舊公無媿世臣愛才逾骨肉高識近星辰修學
惟尊漢藏金不數秦

公藏商周彝器足繼宣和博古之後

別離方昨日淒絕

感恩身

才大能醫國時危特薦賢秉樞三月少扶直萬夫傳執卷

期門習疏渠潦水遷堂堂論治績真到古人前

大雅衰微後洪波萬派隨遺經王肅改新說啖生滋好古
敦前緒高言紐絕維千秋誠不沫一慟豈吾私

昔年客京洛未敢謁膺門乍枉奇書贈兼蒙國士論大雲
俄輟景旭日慘將昏下馬他年拜憑何慰九原

讀書

皓月臨書幌微寒襲短襟不知人代改惟覺性情深
仙苗長安弦越調沉熟聞齊物意惆悵愧如今

東瀨禮卿前輩

光典

索詩集

聞得天南信傷情爲左芬

時前輩方有妹喪

懸知詠史筆不暇定

吾文錦瑟迷離怨名香窈窕熏有情易漂落誰與證聲聞
潞水舟次

春色在楊柳北風猶峭寒城陰連岸暝浦浪激雲寬蔬少
廚人計鐘殘旅夢安篋書留諫草未折寸心丹

雄縣道中

時方有水災

燕趙積高地今同澤國憂連橋低浸水高樹上行舟策歎
河防拙顏爲道殣途中有餓斃者雲中叫新雁嗟爾稻梁謀

渡黃河

馬首見山色王程渡向南曾聞曲防誓寧信闕流貪風靜
波猶勁天暝影不涵朝陽起人意隄柳綠毳毳

深夜閱卷倦極偶書時已過重九矣

中宵恆數起絳蠟照昏花暗恐拋靈藥奇如訪佛牙淚衫
還自省意尺詎無差不覺深秋雨牆陰長昔邪

徐定生世丈

樹鰐

葛豫齋同年

祥熊

各和原韻再疊

韻贈之

久聞賢令尹善俗愛栽花共事傾肝膽憐才借齒牙誤書
思脫簡密率案招差騰錄多錯誤策問中算法尤甚坐似談禪客深求末
賴邪

龍硯仙

璋

鄭德夫

葆清

戴秉召

朝普

孫花樓

友萼

諸

君皆有和章仍次前韻答之

稠疊鱗鱗積春條燦四花談經能折角射義每擊牙良友

占星聚人才恐歲差

龔定菴詩云一代人才有歲差今年

戲及偶然成險韻還似縛渾邪

徐東甫侍郎前輩次韻見贈仍依韻答之

岱嶽鍾靈秀鴻文映若華九秋辭豹尾百寶網犀牙末學

叨聯事追陪共勘差何當相司馬有願祝汙邪

仍疊前韻索諸同事和詩

瑣院淹旬朔秋山榭已花衣魚遊硯底乾鵲盼簷牙

江日來

榜發甚盼諸第捷音文陳重圍密義輪一綫差拙詩無巧對不復憶

朱邪

九疊前韻答龍硯仙

以前尚有三疊不錄自注

之子瀟湘彥清才玉樹花詩篇補經首經讀證積牙書已

成刊誤

君集唐以前小學書成三十卷

音寧欲校差

來詩欲譚音學瀟瀾海

若富何用乞波邪

水名見大滄槃卷十三

雞鳴寺

江山悄如夢黯黹歲寒時不見垂楊色空嗟蕙草衰平湖

膠似鏡斜日澹含姿尙想功名事栖塵漫古祠

舟至湖口得詩一首

昔伴征鴻去今看倦鳥歸濤聲五月壯雲影四山圍平野

滋芳草孤蓬趁夕霏獨慙賒酒興未敢典朝衣

徐園

獨尋芳草地已是十年心
孔雀無新羽蕉花滿故林
微風戛修竹冷然金石音
此地得岑寂余聞天籟琴

夜坐

遲遲初月上擾擾沸星繁
林宿羽聲息鐙微魂夢安
驚風動河漢天道日艱難
秋深此廬蟄何似嚴陵灘

偕陳大伯嚴梁大星海徐園燕坐竟日

昨日分江海茲辰共小園
夕陽尤可愛秋水欲忘言
隔院疎棋響迴闌澹粉痕
由來翫芳草不辦問朝昏

山居

澗水溜槽白叢篁插壁青苔深葦入室月黑虎窺庭但苦
盤蔬遠時聞雜草馨倚巖聽虛籟心與萬緣冥

贈梁卓如

王府刀仍在巍然乘願生照天純月色驚世忽金聲雷電
象華發樓臺蠶市晴兒童齊拍手君馬慎由庚

哀許侍郎袁太常

荃德猶能察蘭薰信必鋤燕巢人自樂魚爛國將墟梁劍
堪爰盜吳鏤賜伍胥風沙滿燕薊歸櫬定何如

歲暮

寰寓悲風激波濤迫歲除飲江天竺馬攤市茂陵書芳物

朝餐菊冥心夕據梧寂寥人世改吾計定全疏

大道塵成浪人間世底忙無愁過鴈序久客戀鱸鄉燈燼

邀殘月衾寒怯早霜新茶初潑乳與俗澹相忘

唐錢珝詩
人間馳競

處塵土
自波成

答沈子培刑部寄贈

事幻程生馬途難蹇上天藏身無尺木墜翮警空弦惡草
誰除蔓芳蘭不惜煎賈生徒碌碌一任大鈞權

附原作

化石終焉補銜碑未有期魚羊悲世日魑魅喜人時獨
鶴歸何嚮踣輪轉可知途窮言語盡槁項老奚辭

贈田邊碧堂

主客盡名哲清談移晷陰
令予滄海客渾忘故鄉心
兵庫酒中聖源鄉詞冠今
何當登富嶽攀樹一長吟

養疴有作

削迹歸南國勞精遡北風
我原無病病世孰不窮窮
白璧誠無點青山道自崇
橫流方未已詎敢息微躬

辛丑新年

謫籍棲遲久頽波感慨頻
新年增白髮故國滿青燐
星朗空江夕花濃小檻春
迂生謀已拙窺管驗勾陳

誰解橫刀出真成下殿趨
亡秦三戶在哀郢兩門蕪
日月

迴元運風雲感聖謨會聞哀痛詔寰海慶昭蘇

讀元遺山集

艱難戎馬亂離秋莽莽鄉關日暮愁枉道漏天容補石誰
知滄海竟橫流心傷旅鴈來并郡淚灑神龍困蔡州頭白
歸來更何事齎鹽隨例一生休

國亡史作愴閒身長慶歌辭樂府新九代詩章分甲乙一
編遺事逮壬辰歸田許作柴桑士上疏應稱草莽臣莫漫
信他京叔語當時受賞果何人

金元之際風流歇天老虞卿好著書南渡衣冠魂夢裏中
州文獻戰爭餘百年閱歷滄桑局一室蕭閒水竹居垂老

靈光名更重溥南遺集未能如

故國凋零兩鬢霜漂萍身世感蒼茫
鑾輿已出青城道玉輦翻幽碧照堂
避世未容隨綺季論詩真不讓蘇黃
遺編萬丈光芒在未敢丹青著短長

春日廣州作

九衢歌管日喧闐一室儒生自聖顛
夢好難尋人境外花開如見古皇前
街丁逐疫敲銅鼓一冬無雨正月疫癘盛行游女嬉春
墮翠鈿不是江湖長挂眼久居嶺表亦安然

追悼番禺張延秋編修

鼎華

重到燕臺第幾春瀟瀟夜雨獨傷神
金環再世知何地

平君

生不信輪迴之事乃竟有之頃者有一不食者竟日忽醒告人

曰輪迴之事乃竟有之頃者有一不食者竟日忽醒告人

小亦在其家中將生崇文門內玉樹長埋惜此人幼慧五羊神

時於客席中有以兩儀生四象索對句者君應聲曰五岳

式副榜十六歲舉京兆時人咸以衛玠目之余識君在粵

東君諷采時名見顧于光孝寺時年三十餘猶白哲少年

也命薄幸無妻子累君卒時年四十三情多獨與友朋親

朋友聞耗者無不哭喪花零落風流盡莫向旃檀問夙

失聲君于友誼可知矣因善君生時見其借宅云

平明策馬竟何之柳禿蘆荒又一時倚杖但懷陶令酒觀

星曾詠仲初詩天心好織機中錦國手難甦劫後棋如鏡

文道希先生遺詩

五

...

東湖堪釣鯉素衣不爲洛塵緇

夏日

閒中殘暑又三庚靜聽鳴蟬斷續聲
疏雨灑窗聊引睡疾雷破柱不須驚
藥多涼品身猶健書讀皇初眼倍明
學圃未能先遠市晚炊香稻戛瓜羹

八表

八表停雲一浩歌仙山樓閣近如何
滄江水闊蛟鼉橫沙岸霜寒雁鷺多
長佩行吟非澤畔短衣射獵想山阿
斜風細雨須歸去那羨神仙張志和

鷓鴣

鷓鴣飛下最高枝，萬里風雲與護持。
淮海微禽寧速化，江湖魏闕有餘思。
薄寒捐扇驚秋早，細雨聞鐘覓夢遲。
負手逍遙桑落下，澹看窗格罽蛛絲。

八月十八日偕王氏姊彭氏妹同遊橫龍洞

濟尼能說林下韻，往往輟塵登翠微。
秋深旣雨城郭淨，寺僻無僧鐘鼓稀。
幽巖香高桂空老，放生泉清魚自肥。
徘徊父祖舊遊地，日暮風緊可添衣。

附和作

二姊芸英

吾弟看山夙多興，導我名勝窮幽微。
賞心泉石境漪美，聞根桂槿香依稀。
著蔡示兆无咎悔，霖雨需才寧遯肥。

緬懷清芬起恭敬良遊惜別還霑衣

又

八弟廷華

清遊有約不孤往雨過塵輕秋氣微暫合雁行仍斷續

此遊弟以事未能同行前蹤鴻爪尙依稀山中泉潔何須出霜後

楓丹不礙肥歡會未終驪唱起瑤篇遠和欲霑衣

春感一首

朝朝送客出長安愛翫輕陰獨倚闌書史儘供愁裏讀山
河頻向月中看誰家擲笛傳清怨何處呼鐙起暮寒失笑
定巢雙燕子簾前猶自語千般

楊厚菴宮保輓詩

公謚勇恪年六十八

口如馮異不言功心似營平最樸忠水戰暗符名將法山

容真見大臣風階前枯樹英雄暮公自言年歲已晚國家除拜必不受惟兵革無

聯冢上靈芝孝感通公母卒廬墓三年麟閣勳成箕尾去故人揮

淚望征鴻

修門

修門芳草色萋萋此去關河路不迷千里久思黃鵠舉一

春長笑亂鴉啼參差島嶼雲初變迢遞樓臺日易低驛館

燈昏沉睡裏何因不唱汝南雞

讀楚辭

高陽苗裔有靈均此是衰周第一人常歎楚懷何足福固

非虞舜不能臣九疑雲鎖蒼梧迥五月潮生角黍新邈絕
巫陽招不得大荒披髮下麒麟

答宗室伯義祭酒見贈之作

鬱華閣裏警秋聲道在忘身况強名十葉承華真帝胄五
經通貫老儒生如聞撫劍憂邊塞復此銜杯樂聖明未敢
勸君焚芰製寂寥太學想陽城

伯義詩有此生終老芰荷衣之句

聞道

聞道崆峒使節迴衆仙同會集靈臺天河翠浪銷兵氣內
苑祥風灑壽杯織就錦鯨鋪席罷詔將丹鳳送書來何因
玉女窗扉近還向胡僧問劫灰

菊坡精舍謁先師陳蘭甫京卿祠

先生有道堪千載文範云亡倏九年
撰杖威儀今已矣傍簷梅柳故依然
再傳定有真儒出百卷曾無一字偏
日邁月征懷往訓此心長飲在山泉

夜泊香港

鼇擲鯨呿氣自橫飄然書劍又孤征
鬼燈明滅非人境山市虛無似化城
曉霧但愁銷蜃氣夜潮時復警雞聲
書生結習今餘幾倦倚篷窗夢太平

贈汪芙生

豫

閒觀歲月逝駸駸七尺匡床著作林
茶罷略披柱下史夢

回初聽海潮音目無餘子獨憐我後有千秋誰見心待約
看梅共尊酒鱸灰撥盡話深沈

讀芝隱室集追懷樂初將軍

公諱長善他塔喇氏補洲鎮紅旗人

征南幕府久相依作賦論兵自一時跌宕琴尊狂客聚任公

廣州將軍署有壺園亭館極美花樹華蔚公又好客公子姪伯愚仲魯兩翰林皆英英逾衆寶從多淵雅之士如張

編修鼎芬暨子皆尤密者也 雍容裘帶士人師公任廣州

旗人奏加科舉額又設明達書院親為校閱 遺詩酷似蘇和

仲公錄坡公詩讀之成誦銘墓吾慚杜牧之滿洲大臣自

率于墓前刻御製碑文而墓誌神道之類皆不用予嘗語伯希祭酒以爲後世欲聞滿洲耆舊行事功烈殆無可徵

也 長憶春明驅馬日淚痕點點落衣緇子丙戌落第出都與公別公曰吾年

暮多病爾無事早來慮不及相見也後雖于丁亥戊子間仍相從八閱月然此語淒感心脾終不能忘矣

讀韋端己集

畫船聽雨惜芳辰
還憶龍飛晉水春
岳牧盡酌金帛價
輿臺都稱綺羅身
焚香猶見星環極
涉世深愁海颺塵
解恨感通當日事
始知端己是詩人

歲暮口占

微暖蘇人研不冰
勘書深夜短檠燈
冗官已似豐年穀
盡歲難爲繫日繩
滄海迴瀾天有意
金門大隱客無能
春情只有梅花覺
瓊島清波第幾層

病中答友人

未親蘿薜強冠裳安穩惟應是睡鄉
世事如觀蕃部伎吾徒何用越人方
信天未及仍憂患學佛無憑墮斷常
酒戶本低詩又澁朗吟秋水憶蒙莊

讀恭親王萃錦吟奉題

袞衣赤鳥在山林猶是綢繆牖戶心
四表已瞻雲蔭大年便覺海波深
偶拈藝苑英華句自寫卷阿正始音
曾讀陽秋懷謝傅蒼生翹首一沉吟

八極喁喁問起居小山叢桂自蕭疏
道超繫表心常曠功在民生意有餘
紫闥不詢溫樹語白雲時繹餌芝書
微生亦負冥鴻志歸泳和風結草廬

有憶

吳門花月薊門霜
萬里雲鱗憶帝鄉
銀燭照人猶旖旎
玉璫緘札總淒涼
懷中自寶支機石
袖裏非無海國裝
欲奏通天臺上表
劇憐臣玉久荒唐

奉命典試江南出都門作

九朝文獻重三吳
常譬人材海孕珠
况是明時須黼黻
要令奇士出菰蘆
不才恐負文章責
經亂庶幾民物蘇
雨後西山添爽氣
山靈知我素心無

長清道中

山川最是初秋好
日淡風輕稱葛衣
已過伏時河欲細
未

經霜際樹猶肥岸頽疊石馬蹄碎路轉隔林蟬響微遮眼
文書渾懶閱柳陰陰處又斜暉

代李義山七夕來時先有期

銀漢波濤有後期隔簾殘劍響參差特因仙使求靈棗自
闢齋廚鍊石芝青鳥西飛傳信密燭龍東上怨行遲雲璈
月瑟殷勤意却恐人間總未知

甲午六月十五日文華殿侍值退而有作

是日日本代理使臣小村壽太郎覲見爲其國君后銀
婚我邦致賀循例申謝也此類之事各國甚多皆未常
見其使臣慶親王奕劻方掌總理各國事務衙門以朝

鮮有事欲示優異於日本特奏請允其覲見惜余先日
不及知劾其煩瀆聖躬兼失國體也

東夷冠帶舊雍容短後衣更効鞠躬雲氣常依瓊島碧日
輪遙射海波紅韎任佇見陳階下頗牧終當出禁中千古
知言惟宋玉微辭一賦大王風

丙申元旦試筆

六龍迴轡敞雲天迢遞春城北斗懸文石陛前新論議黃
金臺上衆才賢試從鄒衍談天後重溯軒轅鑄鼎年海水
萬重星四野蒼生繫命好籌邊

曉宇瞳矓金扇開九衢轂轉殷輕雷挾天繪日閒平德燮

化調元邴魏才御馬錦鞵輝趨起蕃王茸帽簇筇藜迂生
濫廁鵷行末冀見寰瀛獻賚來

胸次崔嵬不可刪放懷直到五雲間其魚魴鱣誰能禦我
馬元黃且未還滄海東來能撼岳太行北去更無山憑誰
重作丙丁鑑覽古憂時獨厚顏

題朱春舫岳阜登高圖圖作於咸豐庚申

一卷蒼茫異境開秋懷勝賞共崔嵬因知岳阜參天處曾
見山翁把酒來北狩風沙龍馭遠南征鼓角雁聲哀沈思
三十年間事豈獨昆明有劫灰

爲徐菊人同年

世昌

題北江舊廬圖

臥龍岡上懷諸葛丹鳳城邊想魏徵曠代風期如可接百
年靈爽况依憑芳蘭剪徑風初靜瘦竹欹簷石有稜諫草
一篇書百卷雲天高擊九秋鷹

徐君風力重明廷欲採蘋蘩爲薦馨直節已充花市隱高
文常乞草堂靈詩傳江左猶留派客話天山不可聽寂寞
草元坊局冷他時誰訊子雲亭

王可莊前輩得十二辰屬象畫索人分題余生丙辰
屬值龍題畫龍長句一首

崢嶸頭角欲馴難變化飛潛亦等閑四百皇圖開漢祖六
爻乾德贊尼山威靈獨出風雷上鱗爪憑人想像間却笑

當年周太史空聞紫氣滿函關

燕臺雜詩

燕臺楊柳漸藏鴉處處春風換物華
金榜朝暉雙鳳闕瓊筵夜醉五侯家
名王韎韞騎高馬蕩婦琵琶訴落花
坐擁牙籤無一事凌雲賦罷日初斜

丙申除夕戲題

日月隨天竟左旋中原猶是太陰年
虛舟已自能藏壑激箭何須歎逝川
玉斝頻斟千日酒金丹還傲十洲仙
債臺高矗青雲表不要渠家壓歲錢

一念新羅頃刻旋吾廬與鶴話堯年
願遊衡岳依明瓚莫

向羅浮訪稚川歲月催人俄已晚江湖託迹宛如仙閒愁
不復撩眉影尙有人賒買酒錢

萍鄉道中雨雪

劍氣琴心共濯磨故鄉乘興一經過入春風雪欺行旅閱
世煙雲幻網羅戰國諸王牛後辱中朝名士馬前多吾州
水激山雄峻會有高才扣角歌

觀我室偶題

迢迢流水欲流雲波影天光以耳分破衲衣中藏世界亂
柴堆裏證聲聞六時觀靜非知道萬倍行師枉策勳後夜
月明輪影現階前落葉任紛紛

張藹卿兵備同年輓詩

兵備名華奎合肥人與余壬午順天鄉試同年己丑成
進士官至四川川東道兵備爲兩廣總督靖達公子余
在靖達幕中期年相得甚歡後重至京華恆追昔款入
蜀以後寄書不達音問闕如但聞其與外國往來極能
持正而已丙申六月卒於任旣得赴告追挽以詩

常以乖崖望故人一杯遙醜倍傷神少年便已關朝局交
際誰堪屬後塵秋爽川原開鄂杜山頽風雨泣峨岷伏波
故壘今磨滅豈獨觀河迹易陳

迴觀

迴觀宙合滿煙塵無賴鶯花漫作春旅館酒醒燈伴客危
欄天遠柳依人蟻封九曲江河小鼇負三山世界新莫是
采芝頭易白逍遙自署葛天民

日本古城貞吉字坦堂相遇滬上贈余以所撰支那
文學史索詩別後却寄

滄海橫流賸此身頭銜私喜署天民豈知零落栖遲地忽
遇嶽崎磊砢人定論文章千古在放懷世界一花新停雲
自此長相憶何處桃源欲問秦

雨中游廬山至師子巖宿東山寺

名山萬態孰致是雲不如雨能冥之游人飛鳥兩俱寂修

竹澗泉惟弄姿林深不見雪色鹿亂定尙少千年枝何人
證我一宿覺寄書爲問鴈門師

漢賈太傅祠

漢文清靜不變法至今長沙有賈生神鵠黃龍非世玩冷
梧高篠快冬晴江山寂寂二千載祠宇蕭蕭三兩楹日暮
循階撫陳迹時聞蝙蝠蝙蝠拂簷聲

病起題長沙天妃宮壁

病起新霜兩鬢添古祠斜日興蕭然當窗梧竹傳虛籟畫
壁龍蛇警晝眠倚杵但愁天北極乘槎莫問海東偏故人
遠寄滄江訊可識維摩不二禪

塵封敗壁居偏靜日射紗廚臥起慵未死且須拋藥裹不
眠恆爲數鄰春千岩秋氣高翔隼九月雷聲起蟄龍聞說
天池風浪急一竿何處得從容

廬山

涼風動谷曙光迎乘興還爲牯嶺行晴日峯巒天子鄣

水經注廬江出三天
于都一本都作障春雲樓閣女兒城地名清時石徑無豺

迹亂後山居變鳥聲繼馬闐風吾亦倦近游聊與寄平生

荒村與彭鴻逵表弟夜話

寥闐乾坤晦迹深月痕不動樹陰陰著書卦已占陽豫贈
劍人猶憶管涔梁甫當年吟葛亮白登有句贈盧諶風飄

車揭今何世轉燭無忘此夜心

金陵除夕謁諸葛忠武祠

起聞臘鼓歲將除獨弔荒祠想壯圖絕代天才嗟入蜀當
時長策在連吳河山百戰英靈改風雪殘冬草木枯勝地
我來仍駐馬江聲千古但雄麤

感事

當年鐵騎重防秋此日天驕踞上游都護不須憂己地司
徒直議棄涼州此崔烈以銅臭為三公宜有十年輸瀉空民
力一紙圖書信鬼謀博望槎迴應有意盧龍賣盡始封侯

贈沈子培丈

側身人海意殷勤久願追從東野雲嗟我祇窺牕罅日煩
君爲運鼻端斤黃蜂作蜜工家計白象騰空斷世聞借問
維摩空丈室何因花雨落紛紛

附和作二首

沈曾植

僻地經過不厭勤眇然人海念孤雲十年已罄王家篋
一器難名鄭國斤猿鶴沙蟲知底化夔虵風蚊偶相聞
西江有讖徠天馬毀表終期釋宛紛

相逢那不盡殷勤聚散拚如嶺上雲秋日情懷彌悄悄
清時小辨會斤斤平生毅豹無全術後世裴劉或異聞
不向枋榆觀搶決誰知塵影自糾紛

再疊韻酬子培丈

草元何事獨辛勤長劍倚天冠切雲觀海自籌舟萬斛參
禪忽證麻三斤浮雲蒼狗變復變白日黃雞聞未聞坐想
鳳儀無竹實臨流不奈九河紛

附和作

沈曾植

廣我篇章密意勤豁如西嶺擘晴雲士師偶惜先生鼎
山木誰逃大國斤萬里仙槎星候遠九秋黃葉雁聲聞
城南且趁登臨約去住人間各放紛

三疊前韻卽題子培所撰蒙古源流事證

細檢唐碑辨特勤遊蹤重證宋家雲矩琮再世應焚硯班

墨當前敢放斤滄海西流今始信崑崙北去古寧聞魯連
自是儒家學一解人間萬事紛

歸日作

動地波濤連北極養生事業樂東臬帆歸極浦江光迴樹
拂寒星夜氣高避世一懸徐孺榻防身雙佩赫連刀英雄
久已淘千古歲月何須數二毛

出京作

短髮蕭疏懶着簪傍簷乾鵲語聲侵鐵無可鑄神州錯寒
不能灰烈士心白羽一揮猶想像青山何處足登臨秦娥
曲裏銷磨盡漢闕唐陵草已深

有感

鷗沒滄江甘息機
鵲占太歲獨知微
黏天海水茫無極
浴日虞淵何所歸
久客心情疎酒盞
嚴寒消息隔重幃
六鰲連釣蓬山蕩
回首人間萬事非

追憶

漂泊江潭未有期
鳳樓龍堞夢參差
霓裳夜奏通三殿
羽檄晨飛又一時
事險幾同狐截尾
名高不望豹留皮
冬郎別有傷心處
漫拂朝冠儘淚垂

中秋夜作

桂魄銷沈夜氣寒
螭龍愁掩水晶盤
山陽下國成名異
湘

水微波寄跡難海闊倘容精衛塞心孤惟共晚楓丹不須
更聽鄰家笛白露庭楸恨自漫

憤吟効韓致光

久拼草野化沙蟲得喪甯歸大冶中沙麓有靈亡漢璽鼎
湖無路殉軒弓九魀訊變謀原誤六博爭天數未終人事
自然關氣運莫將迴斡問蒼穹

蘇州青陽地作

竭來吳楚渾無謂願學漁樵愧未能小舫醉茶尋廢苑涼
宵煮夢向華燈過江客載流人目墾草農耕古帝陵十載
荒蕪化池閣斜陽何用感衰興

過祆祠

索訶世界久成塵三一從何示妙身大食兵傳唐景教休
屠王祭漢金神薔薇花落軍容淡薜荔陰繁鬼語新獨策
青牛關外去當時望氣可無人

休屠王所祭金神乃自在天像也釋典中多可證後

世以爲佛入中國之始謾矣耶蘇之教與婆羅門之一因宗同景教即猶太教余別有攷

徐家匯謁明徐文定公祠

何人杜口向昆邪天學新求海外槎曾爲防秋籌鉄騎更
聞攀架仰銅蛇東神珠色玫瑰豔南國冠容翡翠華把卷
獨憐前世事海風吹酒酌寒鴉

奉答李與九師

江海蓬飄有所思一燈捧卷憶兒時春風紫蔓劉王寺落

日紅棉譙國祠當日守蘄煩壯策師常從先大夫於危城中古來

放屈有餘悲閉門已似三冬蟄敢向南山詠豆萁吾師原作意勸

勿作詩

酌皮麓雲同年

姬姜憔悴坐深讒如草清愁不可刪正則芳馨遺寶佩少
陵生命託長鑱葛巾漉酒聊相勸漆簡傳經自不凡珍樹
百年憑爨了就中誰省蘊英咸

落花

三月春光已路歧夕陽欲下故遲遲風雲方起天猶醉荆

棘當前人未知華表鶴歸猶彷彿木門燕啄自逶迤曹公
信有豪英概爲聽胡笳贖蔡姬

錦瑟淒涼不上弦平蕪漠漠總生烟羅平釁起聞妖鳥蜀
道魂歸化杜鵑愁絕更無天可寄恨深纔信海能填銅仙
熱淚消磨盡况感西風落葉蟬

高樓送客幾沉吟雨橫風狂直至今三月焚秦非浩劫千
年思沛亦雄心關門不限金微遠山色惟憐玉壘深叵耐
玉人消息斷堆烟簾幙總沉沉

翩然青鳥下瑤臺蕭瑟蛾眉亦可哀運去六龍成代謝年
衰八駿可重迴靈和柳色朝朝變玄武籤聲夜夜催早晚

人間金盃出昆明休問劫前灰

轉徵移宮調苦辛徘徊重向曲江濱莫隨流水終歸海尙
有餘香不絕塵吳苑風光看草長楚騷哀怨有蘭紉一聲
么鳳臨窗曲愁絕青門道上人

駐顏無奈水千波寫恨聊憑墨十螺結綺樓成吳客至阿
房宮疊楚人過神山櫻蕊奇光吐海外玫瑰寶曆多一樣
春光感搖落南強北勝誤人何

鳥道鯨波莫問途吳宮楚幕共巢烏有情湖畔三生石無
用樓東十斛珠清暑殿邊開齒茗龍山會上把茱萸蕭疏
葵麥重來處贏得劉郎一嘆吁

曾與松筠共歲寒
愁紅怨紫不堪看
邯鄲道上無遺枕
神武門前早掛冠
月缺尙應憐顧兔
雲深何處覓青鸞
傷春感事渾如夢
便擬還山習大丹

江行舟中感事

春秋名例未宜刪
魯鼎無金可鑄姦
巨釣欲傾龍伯國
妖書誰授鵠鳴山
白頭作賊千人指
黃口何辜萬血殷
坐倚危檣看北斗
沉憂不共海波還

庚子七月至九月感作

誰言國弱更佳兵
其奈狂王憤已盈
鉄騎晨衝丹鳳闕
金輿宵狩白羊城
何人能屈橫流決
今日真憐大廈傾
無分

麻鞋迎道左收京猶望李西平

北狩烽烟越幾時西行旗鼓更堪悲
朝廷衰職尊藍面河朔軍符授赤眉
目斷汾流惟鴈過心驚滄海有龍移
孤臣淚灑荒江畔忍痛新裁變雅詩

淆潼形勝本天然王氣消沉九百年
但使東南漕底柱漫愁烽火徹甘泉
羽觴露浥瑤池讌仙掌晴開玉井蓮
迴首烏龍江上月秋風清淚泣銅仙

燕秦莽莽舊山河到此誰揮落日戈
未必平原頭可匣更無延廣劍橫磨
漫天風雪堯年冷誤國衣冠宋鵲多
前後

沉揚寧得料霜晨攬鏡未蹉跎

陳陶詩禁掖衣冠加宋鵲

幽人

幽人杖策江頭立
潮去潮來變古今
晉代衣冠半南渡
漢家城闕又秋陰
鯨鯢跋浪連山蹙
虎豹當關白日沉
曾記數衽謁虞舜
浮雲西北此時心

和禾原君韻

同洲贈縞話新歡
醉聽清歌七返丹
鐵鑄六洲成錯久
鋼經百鍊化柔難
冲霄龍劍光仍燦
照座鶯花夜未殘
翦燭欲論興廢事
天河不動感微瀾

春風吹暖白蘋江
嘉客來遊泛海艘
叔度風裁容我接
元龍豪氣爲君降
篋中劍術千人敵
鏡裏花光一笑雙
酒半

更添詩思綺夜珠如月勝蘭缸

贈內藤湖南

七國三邊正糾紛
驚猿挂木鴈呼羣
逍遙曠野期遺世
縹緲仙山獨見君
奇字每詢劉貢父
兵謀還憶杜司勳
靈芝鬯草今猶昔
重理瀛洲百代文

和野口寧齋贈詩韻

小院風簾皺細漪
梅花飄霰紙窗知
可無雪櫂尋安道
恰有琴絃待子期
世局長安連□□
君心樂府只銜碑
他時殿閣微涼夕
爭得南薰解愠吹

再疊前韻

聞香讀畫靜風漪春信猶寒燕子知並饜熊魚從我欲相
逢勞鴈與君期優游且唱無愁曲感仰終書有道碑回首
崎陽題別緒南風猶惜片帆吹

書憤

原廟衣冠月出遊誰教洪潦浸神州藏弓客說軒轅墓帶
劍人登漢武丘松檟尙應朱果實風雲長帶白山秋鬱葱
佳氣今猶昔莫忘齊襄九世仇

輓徐仲虎

仲虎以試驗藥物
死於漢陽鍊銅廠

去年樽酒對雍容送客江邊唱懊儂纔見玄珠求赤水驚
聞烈火燎黃琮干將殉劍知何益騶衍談天更不逢雪涕

欲書平子傳一簾淒霧暗吳淞

春日効元人體

東郭先生布履堅杖藜處處訪山泉
苔花繡石都成字松氣連雲欲上天
六鷁退風聊此地五龍夾日待何年
奚童報道辛夷落纔覺江南春可憐

重至南昌百花洲作

淡沱明湖宿霧收西山朝爽恰當樓
一丘又被名臣佔

是地

新建沈文肅祠

半晌聊因勝地留西狩鸞旗初返闕
東屯虎旅罷

防秋五年江海栖遲客重向鍾陵感舊游

爲冒鶴亭題其先世菊飲卷子卷初失去亡友江建

霞得之以還鶴亭

有客蕭然感逝光
水邊籬下寄芬芳
久同皂帽稱遺老
爲愛黃緇近道裝
陶令停雲還憶友
少陵漏雨欲移牀
寂寥二百年間事
留與君家翰墨香

良朋相贈等瓊琚
兩度滄桑事久如
漫擬亡弓仍楚得
可憐獲璧是秦餘
山陽聞笛心多感
漢上題襟意已疏
三載杳然成一夢
那堪重答秣陵書

自宜春返萍鄉道中作

漸覺秋風橘柚黃
便乘竹輦涉江鄉
雲山迴望峯巒合
日午濃蒸草樹香
筋力漸衰三舍遠
村居無事一年長
從來

淥水偏宜酒欲問仙人九醞方

贈吳彥復

久停諫舌寫春愁屈子騷心往不收
世事與誰論出處將門如汝擅風流
朝衣典後天方雪寶劍鳴時氣欲秋
惆悵玉龍無主日斜陽黯黯獨登樓

春陰

十日春陰慘不舒夢中鄉思憶匡廬
愁看北部甘陵事愛讀南華苦縣書
渭穴千年容鳥鼠河圖一卷雜龍魚
草玄不謂時人識竊恐楊雲計已疏

悠悠

荆凡孰得誰能定
毅豹雖殊並有災
主父忽思胡服變
夫差翻喚好冠來
觀魚但問我知我
烹鴈寧論材不材
佩劍左右更相笑
浮雲野馬悠悠哉

書懷

靜玩鑪烟自在香
老槐疏柳易斜陽
身行世路九折坂
夢入廬山三石梁
病起微涼初覺倦
雨餘缺月自生光
欲評汝頰誰優劣
乍可拈毫意已忘

舟中臥病

病軀硯砢安禪易
生事蕭條行路難
范蠡扁舟曾霸越
張良辟穀已無韓
藏山文字旁人錄
蓋海旌旗異日看
九死

要須存國別一生多誤豈儒冠

重渡海有感

地盡神州海水圍此身四顧竟安歸
學書擊劍今何用成佛生天願已違
廣樂近聞天帝醉迂儒翻道祖龍非
惟應萬仞匡廬頂着我雲山老布衣

江望

日出江光明日入江樹暗若無風雨會誰喜
天容紺名利紛牛毛輪轉一何速毋爲海大魚
且卽林中鹿北風連三日峭寒暮夜添陰陽
有時錯炎官何處炎檐前鐵作絲萬里呼
吸報神明翔八極足跡愧遠到

鳥語令人靜市聲使心煩不如沿岸走持竹驗潮痕
江霧何冥冥江風吹我衣還敲鐵如意醺酒醉江斐

新秋

夢破千山月涼生一榻風便思乘薄暝倚杖看雞蟲

夜坐向曉

雪意不成晴晨光黯如夢寥闐課天心願與斯人共
遙夜苦難明他洲日方午一聞翰音啼吾豈愁風雨
攬衣起開門失却門外山非沾衣襟露久立不知還
冥冥雲霧中但聞草樹香可憐弄顏色枝上一鶯黃

途中雜詩

槐棗連山密雲煙過海新六飛南幸路千里不逢人
村兵出相迓面目猶以黑將毋咫尺間化爲綠林客
四戰淮徐地誰教衣錦旋大王學兵法失學地形篇
三泖涼波動五湖飛雁多蕭然江海意一爲扣舷歌

劉融齋中允髮初白解嘲詩云欲使歲寒心皜皜傲
霜雪余行年四十早見二毛明知有涯之生何待
無常之信客遊非樂不如旋歸成物有心或須悠
久輒引其意以寄所懷

霜雪有時化白髮仍可玄伯陽生便爾何用學神仙
心危百形改志長千歲促衆生各安老吾意亦已足

臨帖

不似何必臨太似恐無我遺貌取其神此語庶幾可

未肯下方羅趙可能北學崔盧聊自取適意耳明窗淨几
秋初

讀書雜詠

武成取二三策堯典注十萬言嘯傲南窗風日此時何異
羲軒

未妨舌本生強且喜心源濬通杯裏琉璃泛綠罍間榼杓
煨紅

鵬飛不假六翮牛巨何惜一毛勿論財輕士重舉首但視

煙霄

舉世競言三代規模略具周官兩漢學分今古我知文質
循環

漢劉治雜王霸何必專用儒家惜哉黃老清淨未能宇宙
光華

華嚴廣說世界不可思議尤多堪笑觸蠻主相自矜蟻垤
山河

呼恆神爲小婢對玉皇稱寡人自是三生結習不妨歸釣
江濱

南枝北枝春色東嶺西嶺白雲吾心忍與終古他時何用

移文

六言擬唐人

江漢篇中游女高唐賦裏姚姬情深翠袖寒處香動羅衣
解時將去仍偎半面如愁不語雙眉神仙若許修得還把
神仙贈伊

六言雜詩

喻馬何須非馬問麟但道如麟止水莫知其性浮雲或是
吾身

莫道牖中窺日便堪紙上譚兵深源固多忌刻夷甫實太
鮮明

孟晉且猶惜日曼衍所以窮年蛇蚺蝮翼何待蟲臂鼠肝
偶然

渡海

天作無邊浩蕩池百靈捧日洗成規道人醉倚蓬窗望望
見扶桑十萬枝

詠史

漢四百年基沛縣元三萬里極歐羅佛家別有河圖識未
若金輪世界多

帝出東方本聖言烏龍王氣啓金源我讀摩經无字說更
從西海望崑崙

杭愛山高自一方白翎原向海邊翔何因牧馬思南土天子中原乃衛王

別傳虬髯事未真近人道是蓋蘇文若非晉水真龍起丹穴將求海外君

賭棋別墅是兵機射筈聊城未解圍千古英雄惆悵處秦王十八已龍飛

癸巳元夜

東風不放月華新火樹銀花幻作春猶有歐陽舊詞句柳稍還記去年人

鏡裏初驚白髮新未堪扶病強遊春一燈靜對蒲龕坐已

覺吾非昔日人

春晚偶占

絲雨濛濛濕九州
碧闌干外迥生愁
人間若有瓊簫怨
不遣滄波入海流

羣花無力鬥春寒
遲暮園林怯晚看
行過苔階重回首
他時曾惜一分殘

論詩

風雅而還讀楚辭
紉蘭佩芷不相師
洪爐自有陶鈞術
怕看人間集字詩

莫宗李杜效錢郎
別調元人舊擅場
我友鄭生蘇持此說

出門一笑詠滄浪

久雨絕句

每因屋漏起移床
旋見漚浮似水鄉
誰向天門挾沈翳
六龍曉色照扶桑

冬夜絕句

深撥鑪灰夜已殘
倦憑書幌憶風湍
此生不作芳華怨
偏爲梅花惜歲寒

沒砌纔看雪似鹽
寒帷更訝朔風尖
連天烽火遼陽地
必有征袍取次添

平生古北安西志
不在尋常富貴中
九萬搏扶今日侍

郎投筆有英風

憶志伯愚侍郎濼陽

蕭寥書劍陳無已跌宕琴樽沈下賢

指陳孝堅沈鳳樓

風雪閉門

了無事芋魁煨熟共欣然

五湖烟水非無意未去難忘國士知我誦宜陽舊詩句治

裝應待受降時

家書屢勸南歸以此答之

勞生強半感華顛萬卷徒搜宛委編永夜角聲淒警處敢

將絲管慰中年

酒醺裊縵樂復樂那顧凍雀死枯柯擁鼻聊學洛生詠扣

角不聞寧戚歌

咫尺元門得未曾擁書還惜短檠燈但能穩臥袁安雪那

管宵長被有稜

老漁不與世爭隈倦枕嘗騰夢古槐寶鴨燼殘微暖在喜
看雕斛小花開

平子何緣詠四愁美人縹緲隔崑邱水深雪積無多路卽
是層城十二樓

歲暮懷寄禪

雲山踏破萬千疊宗說遙通上下乘掛屨楓前感今昔緣
何得遇鴈門僧

繆小山前輩張季直修撰鄭蘇龕同年招飲吳園別

後却寄

水風蕭瑟似秋漪側帽臨流半醉時
眼纈忽開春未老濃陰漠漠柳絲絲

忽憶海東風日麗擬開隙地種櫻花

蘇龜曾遊日本

不知富士山

頭雪可似吳王苑裏霞

百年詞派屬常州玉佩瓊瑤集勝遊
卻是止菴懷抱惡東

南日夜大河流余最愛用止菴詞蝶戀花結句云烟裏黃沙遮不住河流日夜東南注是日小山見

贈常州詞錄故云

于湖才筆龍川略我覺張卿似過之
寫取心情煩驛訊春松秋菊可同時

病中口占

門外車聲萬馬馳
厭厭春病對簾帷
白沙翠竹袁江路
長記今朝熱惱時

莫愁湖和壁上璿華女士題句

雲意新收鞞上塵
遠山如黛畫眉真
鬱金堂勝黃金屋
不是長門賣賦人

附原作

輕烟漠漠雨如塵
海燕飛來認不真
廿載重遊湖上路
蘆花應笑白頭人

冬夜絕句

甲午冬寓宣武城內
於時海水羣飛物情
惶駭惟余寂

冥閒居雖有危苦之詞不改蕭曠之度樂與李木齋前輩沈敬甫同年昕夕談聚淡然鑊湯中避熱也今歲已期矣寸陰當惜况在徂年風號壻揚不異疇昔去歲有冬夜絕句爰賡續之誌南北之游蹤敘友朋之歡宴世有知者得無嘆其未諳時變乎

乘雲久戲玉皇家那信寒威折虎牙悔覓霜松巖穴裏暫時堪賞只唐花

平生不解箏琶興住近城南亦應招自是太平供奉急春

場佳劇儘寥寥

余時寓粉坊琉璃街萍鄉會館友人偶約觀劇則粉墨登場者大半庸猥聞近者多

入南府當差故所餘無佳子弟矣

南指臺澎祇一隅西看車里亦區區挑燈自理迂生業細
注皇清職貢圖

樓臺繞樹樹莊嚴此境高寒萬象兼昨夜夢中詩思好月

華剛到水精簾

夜夢得句云樓臺繞萬樹樹寶極莊嚴

枯禪久習空花觀爛睡如遊覩史天卻恨故人頻問訊時
時驚我日高眠

叔度汪汪千頃波伯鸞遁跡五噫歌我今重走邯鄲道奈

爾吳船聽雨何

黃公度梁星海今夏同在金陵遊謙致樂有吳船聽雨圖記之曾聯句填摸魚兒詞

一闕余有句云人易老辦桐帽樓鞋不走邯鄲道今頗自愧其言也

一燈旅館終宵坐却憶江湖載酒時湘浦歸鴻三兩點石

城垂柳萬千絲

十載鍾陵舊寓公
西山晴翠鬱葱龍
如今更向燕南望
指點軍都第幾峯

鸞枝花色最婉婉
置之碧桃紅梅間
繡襦甲帳卽今是
夢醒時時聞佩環

嶺表故人馳素緘
棋經十冊新雕劂
百年舊局更翻覆
得

失寧知荆與凡

得王子展自廣
州寄新刻棋譜

吹面不寒風已春
無衣且慰凍鰥人
天公更肯行新雪
救我三農力苦辛

閏月八日偕志伯愚詹事

銳

左笏卿刑部

紹佐

煦延

堂郎中煦同遊極樂寺望西山率賦二絕

地貧僧守半殘菴
雨過山流深色嵐
且喜飛蝗不相害
稻田旆旆似江南

西山變態有千萬
吾輩交親無二三
不問花開問花落
夕陽無語祇紅酣

乙未元日口占

袖中自有活國手
三十九年奔電如
至竟不慚臣朔餓
當年曾讀帝魁書

吾皇仁孝冠寰瀛
七政焜煌在玉衡
小醜莫矜鉤爪利
王師早筮丈人貞

元夜

鳳闕張燈海宴開
年年宣示萬年杯
魏公高踞金鑾殿
不見漁陽鼓吏來

題徐次舟徐二先生鬼趣圖

欲倩巫陽叫帝闈
青楓月落與招魂
姓名勝入循良傳
萬樹梅花伴郁元

此是陶潛自祭文
寂寥皋壤對斜曛
昆明劫後重回首
定有劉伶酒醉君

平生志業竟多違
欲向重淵且息機
他日誰尋雞酒約
西風裊裊女蘿衣

曾繙皇覽冢墓記千古聖賢終翳如人世浮名君莫問好
留漢臘一篇書

與李洛才惲叔如王振甫諸君夜談荒遠恣肆記之
以詩

西儒耳目不虛用顧以器測非身親我與洛才有同志能
飛先向木星輪

論衡龍虛雷虛篇卓然宜爲後世傳吾觀物理格未盡倏
有倏無誰問天

八星繞日行不息昴宿復爲日所環天河蒼蒼積星氣其
中何者似人間

不飲亦復頽然醉無懷葛天果何世高歌休和離哉翻上
書敢言帝者諦

題姜白石集

茗讐行吟鬢已華淮南皓月夢魂賒桃谿久住因何事記
否凌霄數點花

絕句詠琵琶

潮長江頭是去時畫橈撥水隔秋期不須更譜清商曲長
憶飛凰舞綠絲

夢山絕句

此身元自不曾醒懶向山神更乞靈坡下行人紛似織飛

鴻盡處暮天青

爲易實甫分巡題張夢晉歲寒三友圖實甫以此語

自信爲夢晉後身也

一幅荒寒歲暮心崔徽遺貌待重尋

嵩憤山尚書家有崔徽小象實甫將往求

之龍華劫後才人悟不用魚山鐘梵音

畫成梅竹原非相身似芭蕉寧有堅後際未知前際斷高

樓明月自娟娟

高樓明月清歌夜此是生第幾回夢晉詩也

登山

山鳥招人信口呼登山還問意何如凌雲直上三千尺猶

覺迢迢與我疏

縹緲

縹緲烟雲冪九疑方春惆悵遇秋悲
秦皇赭盡湘山石不見青青斑竹枝

為江建霞編修

標

題畫貓

三首錄一

酒酸不售祇區區我與賢郎用意殊
聞道城門容鼠舞狸

奴不搏固當誅

建霞有佳貓為犬所嚙其子年十三作磔犬文

鴈

按此詩蓋為甲午慈禧萬壽宴高麗使臣作

窮海纍臣賦式微鼓鼙聲緊帛書稀
鈞天廣樂君須記莫

化冤禽海外飛

途中見新鴈

鼎鼎年華百不成回看天地二毛生青冥高舉偏憐汝獨
叫新霜世暗驚

望九華山示從子緝熙

緝熙以進士官安徽
將補東流縣知縣缺

蒼顏奇服鬱秋烟廣坐吾知孟萬年江水滔滔映巖色此
流惟許阿咸賢

爲人題陳圓圓麗妝道妝優婆夷妝三小影

我如臥病維摩詰臥翫紗窗日影移忽覩麗人三幻影滄
桑浩劫不多時

東華門內俗傳有回妃樓未知其審聊賦二絕誌之
小腰結束最風流獨占穠華二十秋如此承恩勝合德不

須重上望鄉樓

近人湘綺樓集記其事近誣故特正之花蕊夫人宮詞回鶻衣裝回鶻馬就中偏稱

身小腰

沙漠寧生禁苑姝琵琶徵調更模黏一從化石凌霄後誰

見明妃上馬圖

聞奉天有遺像悉改爲石云白香山詩吳娘徵調奏湘妃

海上春日雜興

丁酉

春色撩人到十分錦衾良夜夢爲雲漏聲殘後熏鑪永窈窕幽香說與君

海風吹綠上窗紗何處雕梁燕子家試採斷紅供一笑此身無賴已天涯

乍可章臺折柳條莫同黃鵠便冲霄江郎一種愁心處點

染風花送六朝

素鏡分明照卷衣
雲光霞彩萬花圍
臨行不解連環贈
湛湛長江獨自歸

梅花

淺渚迴汀且放船
人家三兩夕陽邊
山川如此荒寒甚
也放梅花特地妍

戊戌人日作

索居不報故人書
地僻休停長者車
今歲春遲花信晚
忍寒還守北山廬

絕句

鳥影空中任所之
朗然芥子納須彌
焚香讀罷河天品
慚謝茗華五字詩

讀華嚴經

方便經中迴出塵
勝鬘寶髻別生春
珊瑚繫項珠垂履
帝釋隨權現女身

戊戌四月同張孝達
尚書沈子培刑部費
屺懷編修同遊焦山
宿仰止軒觀明楊忠
愍公手札卽題其
後

東下蛟鼉爲誰怒
南飛烏鵲夜頻驚
寂寥忠愍祠邊宿
想見英靈發大聲

遊山偶作

山葉巖花處處香
溪聲鳥語並清涼
何須更與人同樂
遊散名山是孔郎

淮南說山無脈絡
禹貢所導世莫尋
欲仿桑欽水經例
條理崑崙東去岑

山山各自有體勢
何必名山方足登
日觀雲峯詫奇絕
回頭已失萬邱陵

岳陽樓題壁

平生不解希文樂
對此能令叔寶愁
俠氣仙心同一醉
江風湖浪自千秋

過洞庭湖

舟人禱福祀靈君
我有狂言願徹聞
借取重湖八百里
肆吾十萬水犀軍

題妹壻彭藻才遺墨

一入承明鬢已絲
鑿坡倬直竟無時
大姚村裏添惆悵
欲增刊第二碑

題章价人銅官感舊圖

感舊銅官事久如
廿年薄宦意蕭疏
却從脩竹參天後
回想青寧未化初

仲由拯溺不受賞
孔聖猶然有後辭
自是相侯觀理異
未

會點勘到韓詩

山居雜詠

雪山笏裏勤求藥，祇樹園中廣施金。
獨有淨名無一語，天風吹座落花深。

石澗纔通三尺瀑，巖梯高竊萬年藤。
窺窗欲下猿偷果，過澗仍回鶴啄冰。

山谷老人親種樹，碧池處士舊憑闌。
斜陽不改青山色，寄語時賢鄭重看。

蕭然歲晚下緇帷，緝綴閒言且作詩。
野蘚漸乾知雨斷，枯槿無葉任風吹。

月波潏灩五更頭松子敲鏗落瓦溝驚起幽人眠未熟霜
華寒入敝貂裘

蘿帶緣門薜荔衣亮無熱客叩岩扉相逢樵子彈棋局青
樾林間賣藥歸

都中偶作

十丈緇塵染素衣故山回首意多違梁園賦客應惆悵費
盡黃金買昨非

擬古宮詞

鶉鴝聲催夜未央高燒銀蠟照嚴妝臺前特設朱墩坐爲
召昭儀讀奏章

富貴同誰共久長
劇憐無術媚姑嫜
房星乍掩飛霜殿
已報中宮撤膳房

椽筆荒唐夢久虛
河陽才調問何如
罡風午夜忽忽甚
玉几休疑末命疏

鼎湖龍去已多年
重見昭丘版築篇
珍重惠陵純孝意
大官休省水衡錢

金屋當年未築成
影娥池畔月華生
玉清追著緣何事
親攬羅衣問小名

桂堂南畔最消魂
楚客微辭未忍言
祇是夜深風露冷
黃輿催送出宮門

九重高會集仙桃
玉女真妃慶內朝
末座誰陪王母席
延年女弟最嬌嬈

未央宮闕自崢嶸
夜靜誰聞吠影聲
想見瑤池春宴罷
楊花二月滿江城

河伯軒窗透碧紗
神光入戶湛蘭芽
東風不解傷心事
一夕齊開白奈花

藏珠通內憶當年
風露青冥忽上仙
重詠景陽宮井句
菱乾月蝕弔嬋娟

千門鎖鑰重魚宸
東苑關防一倍真
廿載垂衣勤儉德
愧無椽筆寫光塵

各倚錢神列上台建章門戶一齊開雲陽宮近甘泉北兩
度秋風落玉槐

月檻風闌擬未央少游新署藝游郎一時禁樞抄傳遍誰
是凌雲韋仲將

書省高才四十年暗將明德起居編獨憐批盡三千牘一
卷研神記不傳

水殿荷香綽約開君王青翰看花回十三宮女同描寫第
一無如阿婉才

手摘珠松睡不成無因得見鳳雛生綠章爲奏鷓儀殿不
種桐花種女貞

詔從南海索鮫珠更責西戎象載瑜莫問漁陽擊鼓事驪
山仙樂總模糊

龍耕瑤草已成烟海國奇芬自古傳製就好通三島路載
來新泛九江船

碧海波澄晝景暄畫師茶匠各分番何人射得春燈謎著
得銀鞵便謝恩

雲漢無涯象紫宮昆明池水漢時功三千犀弩沈潮去祇
在瑤臺一笑中

彩鳳搖搖下紫霞昆山日午未回車玉釵敲折無人會高
詠青臺雀採花

筠藍采葉盡吳姝
絲館嵐輕織作殊
新色綺花千樣好
兒家提調費工夫

斜插雲翹淺抹朱
分明粉黛發南都
榴裙襯出鞦韆學
得凌波步也無

春老庭花喜未殘
雲浮翠輦上星壇
緱山笙鶴無消息
惆悵梁新對脈難

九日梵王渡野眺

鬧蛾十里揚州市
戲馬千年宋武臺
今日水雲鄉裏住
秋

花微笑向人開

水雲鄉
茶肆名

庚子亂後滬上有贈

翦翦西風入畫樓漫將杯盞饜深秋傷心黃浦橋頭水只
照朱顏不照愁

莫因垂老話顛狂子美詩中黃四娘青裙縞袂窗前坐殘
照西風柳帶長

望斷天孫織女車杜蘭貧病尙移家早知萬劫成千劫悔
不江頭學浣紗

十年家國有滄桑星換歌場更舞場零落一枝誰可贈壽
陽珠翠不成妝

茲編校印竟續得師詩三首茲附于後 恭綽記

題張樵野侍郎運甓齋話別圖

虎符龍節壯波濤榕樹風微海日高天子方通西海使王
臣敢憚北山勞百年新國無成論九變英謀寓武韜重撫
丹青憶疇昔籌邊心苦見霜毛

夕陽

有盡浮生不盡愁夕陽西下海東流楚臣去國蘭爲佩漢
帝懷人桂作舟夢裏但驚春晚晚宵殘猶有月句留徘徊
綠葉成陰後雨橫風狂得小休

京師遇雪門大兄和作

我兄本豪傑強仕忽蹉跎四海飄零久平生涕淚多賦傳
疑雨幻詩爲履霜譌誰見光芒起龍淵與太阿
流落關天意艱難見物情回瀾有滄海落日况長征酒醒
難溫夢棋殘莫戀枰壘鹽隨分足慎勿厭柴荆